


Lets in Osterie: “Nome chê lenga chî a ne permet da favelâ”



Lets in Ostarie:

Dome chê lenga chî a ne permet da favelâ

Federico Tavan

dai timps di USMIS e dal C.S.A. al infinit

par cure dal Coletif Chialtres

CE LIBRI ISAL?

Un libri di poesiis, intervistis, scrits e ricuarts che al è jessût tal 2014 par cure dal Coletif Chialtres di San Zorz e che al met dongje une vore di materiâl par memoreâ e mostrâ la cifre poetiche e la persone di Federico Tavan. Al à dentri une vore di poesiis, dutis cu la traduzion par talian, plui scrits e letaris lassadis inte caligrafie originâl, fotografiis e articui di chei che a à cognossût l'autôr.

MA CUI ISAL L'AUTÔR?

I autôrs a son tancj, daûr dal non coletif Chialtres, e in particulâr Massimo Masolini, Federico Sabot, Cristina Babierato, Carla Cigaina, Pauli Cantarut, Raffaele BB Lazzara, Donato Toffoli. ancje se i ringracjaments a van a une vore di plui int.

MA CE ISAL DENTRI, DI PRECÎS?

Poesiis di Federico Tavan, prin di dut, gjavadis da lis variis publicazions dulà che a jerin jessudis e metudis dongje (Comugne, Usmis, Patre dal Friûl, ...), da lis fotografiis, dai articui jessûts tai agns che a contavin de vite e de opare di Federico, e soledut, letaris autografis che Tavan al veve indreçât a siei amîs. Al ven fûr un cuadri, che al mostre **persone, poete e dut che al jere ator di lui.**

MA A CUI I PUEDIAL PLASÊ?

A ducj i amants de poesie no convenzionâl, de fuarce de peraule, dal furlan stuart di Andreis, di Federico Tavan e di dut un Friûl che al è platât ma fuartissim. A chei che a àn voie di savê di plui su une figure pôc cognossude che e meteve dongje poetiche e politiche, fuarce espressive e vite di ogni dî, dispes tragjiche, come chê dal poete di Andreis. A ducj chei che a vuelin cognossi la leterature furlane fintremai tai siei cjantons plui biei, e dificii di rivâ.

E SE O AI VOIE DI CJOILU?

Nol è facil. Al è un libri prodot e stampât in propi, cence codiç isbn e distribuzion intes libreriis. La vie plui curte e je probabilmentri chê di lâ li di Onde Furlane o di domandâi e chei dal coletîf Chialtres (chialtres@gmail.com). O pûr si pues simpri provâ a scrivi a ucuè e uluè e al basta gozâ, mo!